

ACTA DA REUNIÓN ORDINARIA DA COMISIÓN INFORMATIVA DE TRANSPARENCIA, RÉXIME INTERNO E FACENDA DO DÍA 19 DE SETEMBRO DE 2025.

PRESIDENTE:

D. JESÚS VÁZQUEZ ALMUIÑA.

VOGAIS:

D. RICARDO MARTÍNEZ CHANTADA.
D. JAVIER TOURÍS ROMERO (*En substitución de DONA LUISA MARÍA SÁNCHEZ MÉNDEZ*).
D. RAFAEL DOMÍNGUEZ ARTIME.
D. JORGE CUBELA LÓPEZ.
DONA BELÉN CACHAFEIRO ANTA.
DONA MARÍA PILAR RAMALLO VÁZQUEZ.
D. MANUEL ALEJANDRO LORENZO ALONSO.
D. MARCOS GUIASOLA PADÍN (*Na vancante de DONA MARÍA NAVA CASTRO DOMÍNGUEZ*).
DONA ANA LAURA IGLESIAS GÓNZÁLEZ.
D. GORKA GÓMEZ DÍAZ.
DONA DIGNA ROSA RIVAS GÓMEZ.
DONA NURIA RODRÍGUEZ RODRÍGUEZ.
D. GREGORIO LUIS AGÍS GÓMEZ.
D. JAVIER IGLESIAS MOUGÁN.
D. XOSÉ CESÁREO MOSQUERA LORENZO.
DONA MARÍA MANUELA RODRÍGUEZ PUMAR.

En Pontevedra, na sala de xuntas do Pazo Provincial, sendo as doce horas do día 19 de setembro de 2025 asisten, baixo a Presidencia de D. Jesús Vázquez Almuiña Presidente da Comisión Informativa de Transparencia, Réxime Interno e Facenda, as deputadas e deputados que ó marxe se sinalan, membros de dita Comisión, de acordo coa correspondente Orde do Día.

Asisten o Sr. Interventor, D. Antonio Graña Gómez e tamén o Sr. Secretario, D. Carlos Cuadrado Romay.

Non asiste a Deputada, Dona Luisa María Sánchez Méndez, sendo substituída polo Deputado, D. Javier Tourís Romero.

O Deputado D. Marcos Guisasola Padín, asiste a reunión no posto vacante que corresponde o grupo provincial do Partido Popular debido a renuncia da Deputada, María Nava Castro Domínguez.

Actúa como Secretario, por delegación do Sr. Secretario Xeral, Don José Antonio Gulías Varela, Técnico de Xestión do Servizo de Contratación, Facenda e Patrimonio.

Aberta a sesión, adoptáronse os seguintes acordos:

- 1. *Aprobación, se procede, da acta da reunión extraordinaria da Comisión Informativa de Transparencia, Réxime Interno e Facenda, correspondente o día 5 de setembro de 2025. (Expte.- 2023057599).***

Sometido a votación o asunto, apróbase por unanimidade a acta da reunión anterior da Comisión Informativa de Transparencia, Réxime Interno e Facenda, corresponde a sesión extraordinaria do día 5 de setembro de 2025.



2. Adxudicación do procedemento convocado mediante concurso público para o alleamento ou constitución dun dereito de superficie de varias parcelas (10) resultantes do proxecto de parcelación do Plan de sectorización do solo urbanizable e industrial Outeda-Curro (SRAU-I Outeda Curro) (Concello de Barro). (Exptes.- 2025062454 -2025045268 -2025030363).

O Presidente da Comisión somete a debate a proposta de acordo sobre a adxudicación do procedemento convocado mediante concurso público para o alleamento ou constitución dun dereito de superficie de varias parcelas (10) resultantes do proxecto de parcelación do Plan de sectorización do solo urbanizable e industrial Outeda-Curro (SRAU-I Outeda Curro) (Concello de Barro), asinada con data 16 de setembro de 2025 pola Técnica de Xestión do Servizo de Asistencia Intermunicipal e pola Vicepresidenta segunda, cuxo contido é o seguinte:

“O Pleno da Deputación Provincial de Pontevedra, na sesión ordinaria celebrada o 27 de xuño de 2025, aprobou o expediente do concurso público para o alleamento ou constitución dun dereito de superficie, mediante procedemento aberto, de varias parcelas (10) resultantes do proxecto de parcelación do Plan de Sectorización do solo urbanizable e industrial Outeda-Curro (SRAU-I Outeda-Curro) (Barro), polos importes que figuraban para cada parcela no anexo IV do prego de cláusulas económicas administrativas, a razón de 99,00€/m², IVE excluído, e de 119,79€/m², IVE engadido.

O procedemento convocouse mediante anuncio de licitación publicado no Boletín oficial da provincia de Pontevedra e no Perfil de Contratación da Deputación de Pontevedra, integrado na Plataforma de Contratación do Sector Público, con data 04/07/2025. Na mesma data, publicáronse no Perfil de Contratación os pregos de cláusulas económico-administrativas deste procedemento.

Rematado o prazo de presentación de ofertas, a Mesa de Contratación, na sesión do día 07/08/2025, procedeu á apertura electrónica e cualificación dos sobres “A” e “B”, correspondentes á documentación administrativa/económica presentada pola empresa TRANSPORTES CAMESELLE, SL (B36058493), (única empresa que concorreu á licitación), en relación ás parcelas A-22 de 5.383,62 m² e A-24 de 5.460,73 m².

Visto o informe de valoración da oferta presentada pola empresa TRANSPORTES CAMESELLE, SL emitido polo Técnico colaborador do Polígono de Barro, en data 14/08/2025, (CSV): 3Q4T5NAOJ8H3OA2P, a Mesa de Contratación, na sesión do día 21/08/2025, acordou prestar conformidade o citado informe, así como aprobar a clasificación das ofertas presentadas ao concurso público e propoñer ao órgano de contratación, unha vez efectuado e cumprimentado o requirimento da documentación establecida no artigo 150.2 da Lei 9/2017, do 8 de novembro, de Contratos do Sector Público, a adxudicación da constitución dun dereito de superficie sobre as parcelas A-22 e A-24 do Polígono de Barro, á empresa TRANSPORTES CAMESELLE, S.L. (B36058493), polos prezos e valores ofertados por dita empresa.



Visto que por Resolución Presidencial número 2025006994, de data 25 de agosto de 2025, procedeuse a requirir ao licitador para que aportase a documentación esixida nos pregos de cláusulas económico-administrativas, e que en data 5 de setembro de 2025 (nº de rexistro web2025063048) a empresa TRANSPORTES CAMESELLE S.L. aportou a documentación xustificativa de atoparse ao corrente no cumprimento das súas obrigas tributarias, coa Deputación de Pontevedra e coa Seguridade Social; así como o documento acreditativo do depósito das garantías definitivas por importe equivalente ao 100% do canon anual ofertado sen IVE á que se refire a cláusula décimo oitava do PCAP; neste caso 32.624,74 € (parcela A-22) e 33.092,02 € (parcela A-24).

Vistos os informes favorables do Técnico-Colaborador do Polígono, que conta co conforme do Secretario, e da Intervención Provincial, de datas 8 e 16 de setembro de 2025, respectivamente.

Considerando que conforme á disposición adicional segunda da Lei 9/2017, do 8 de novembro, de contratos do sector público, correspóndelle ao Pleno a competencia neste expediente.

Á vista do exposto, o Pleno, de conformidade co ditame da Comisión Informativa de Transparencia, Réxime Interno e Facenda, ACORDA:

Primeiro. *Adxudicar á empresa TRANSPORTES CAMESELLE S.L. (B36058493) a constitución dun dereito de superficie, con opción de compra, sobre as parcelas A-22 e A-24 do Polígono de Barro conforme ao cadro de financiación reflectido no informe da Intervención Provincial, de data 16 de setembro de 2025, e cun prazo de vixencia de 25 anos.*

De acordo co disposto no Prego de cláusulas administrativas particulares, o adxudicatario procederá ao ingreso da parte proporcional do canon anual ofertado calculado desde o momento da notificación da adxudicación ata a finalización do ano natural en curso (31 de decembro), máis o IVE correspondente, dentro dos trinta días seguintes á notificación da adxudicación do dereito de superficie sobre a citada parcela; o ingreso realizarase mediante transferencia bancaria á conta corrente e no prazo que se indique ao efecto na liquidación que se practique e notifique pola Deputación de Pontevedra (achegarse factura), e contabilizarase con cargo ao concepto orzamentario “25/456-609.00 venta de parcelas polígono” no primeiro exercicio 2025.

Nas seguintes anualidades o canon anual actualizado (conforme á fórmula de revisión prevista na cláusula novena), máis o IVE correspondente, ingresarse mediante transferencia bancaria á conta corrente que se indique ao efecto, dentro do primeiro trimestre natural de cada ano, no prazo que se sinale na liquidación que se practique e notifique pola Deputación de Pontevedra.

Segundo. *Proceder á devolución das garantías provisionais depositadas pola empresa TRANSPORTES CAMESELLE S.L. para optar á licitación, de conformidade co disposto na cláusula décimo terceira do PCAP, unha vez formalizado o contrato, e que son as seguintes:*



-Parcela A-22, 10.659,57 €, operación OCVD-CVD, co número 12025000148141.

-Parcela A-24, 10.921,46 €, operación OCVD-CVD, co número 12025000148145

Terceiro. *Efectuar o alleamento ou constitución dun dereito de superficie, por adxudicación directa, das oito (8) parcelas sobre as que non se recibiu ningunha oferta, durante o prazo dun ano a contar dende a publicación deste acordo plenario no Boletín Oficial da Provincia e no perfil de contratante da Deputación de Pontevedra, de conformidade co disposto no informe do Técnico colaborador do Polígono de data 8 de setembro de 2025.*

Dita adxudicación farase en iguais condicións ás que se ofertaron no prego deste concurso, previa aceptación das mesmas polos posibles adquirentes, coa finalidade de salvagardar os principios de publicidade, igualdade e libre concorrencia.”

Unha vez debatido o asunto e segundo o establecido nos artigos 32 da Lei 7/1985, de 2 de abril, reguladora das bases do réxime local, 52 do Regulamento orgánico da Deputación de Pontevedra e 126 do Real Decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das entidades locais, sométese a votación a proposta de acordo sobre a aprobación sobre a adxudicación do procedemento convocado mediante concurso público para o alleamento ou constitución dun dereito de superficie de varias parcelas (10) resultantes do proxecto de parcelación do Plan de sectorización do solo urbanizable e industrial Outeda-Curro (SRAU-I Outeda Curro) (Concello de Barro).

O resultado da votación foi o seguinte:

- 1. Votos a favor: (17)**, sendo nove (9) do grupo provincial do Partido Popular, seis (6) do grupo provincial do PSdeG-PSOE, e dous (2) do grupo provincial do BNG.
- 2. Votos en contra: (0)**, ningún.
- 3. Abstencións: (0)**, ningunha.

A Comisión Informativa de Transparencia, Réxime Interno e Facenda ditamina favorablemente a proposta de acordo sobre a adxudicación do procedemento convocado mediante concurso público para o alleamento ou constitución dun dereito de superficie de varias parcelas (10) resultantes do proxecto de parcelación do Plan de sectorización do solo urbanizable e industrial Outeda-Curro (SRAU-I Outeda Curro) (Concello de Barro), cos votos a favor das Deputadas e Deputados dos grupos provinciais do Partido Popular, do PSdeG-PSOE e do BNG.



3. *Solicitud dunha funcionaria interina que presta servizos no Centro Príncipe Felipe para compatibilizar o desempeño do seu posto de traballo co exercicio dunha segunda actividade no sector privado. (Exptes.- 2025062457 – 2025061231).*

O Presidente da Comisión somete a debate a proposta de acordo sobre a solicitude dunha funcionaria interina que presta servizos no Centro Príncipe Felipe para compatibilizar o desempeño do seu posto de traballo co exercicio dunha segunda actividade no sector privado, asinada con data 15 de setembro de 2025 pola Xefa do Servizo de Recursos Humanos e Formación e polo Deputado Delegado da área de Asistencia aos Concellos, Transparencia e Administración Xeral, cuxo contido é o seguinte:

“Visto o informe da xefa do Servizo de RRHH e Formación de data 12 de setembro de 2025, que textualmente di:

“ANTECEDENTES

*1º.- Mediante escrito presentado no Rexistro xeral da Deputación Provincial de Pontevedra o 5 de setembro do 2025, DONA SUSANA MOSTEIRO FALCÓN, con DNI nº ***7694**, funcionaria interina como oficiala cociñeira adscrita ó Centro Príncipe Felipe, solicita autorización con efectos do 08/09/2025 e ata o 19/10/2025, para compatibilizar o desempeño do seu posto de traballo cunha segunda actividade no sector privado como cociñeira no Hotel Piñeiro.*

Así mesmo, declara que a súa actividade como cociñeira será realizada nun horario que non interfira co desenvolvemento da súa función pública e en todo caso cun horario inferior á metade da xornada semanal ordinaria de traballo na Deputación.

2º.- O posto de traballo que desempeña no Centro Príncipe Felipe da Deputación de Pontevedra ten asignada unha retribución bruta mensual con todos os conceptos prorrateados de 2.158,35 €.

3º.- A interesada percibe un complemento específico de 568,43 €/mes, que supera o 30% das retribucións básicas excluída a antigüidade (274,23 €/mes), polo que renuncia á percepción desta cantidade.

4º.- Este recoñecemento non pode afectar á xornada e horario de traballo establecido no Centro Príncipe Felipe, de 8:00 a 15:00 horas ou de 15:00 a 22:00 horas en quendas semanais alternas, de luns a venres, estando prevista a realización de traballo de forma rotatoria as fins de semana.

CONSIDERACIÓNS NORMATIVAS



1º.- Lei 53/84, do 26 de decembro, de incompatibilidades do persoal ao servizo das Administracións Públicas.

2º.- Real Decreto 598/85, do 30 de abril, sobre incompatibilidades do persoal ao servizo da Administración do Estado, da Seguridade Social e dos Entes, Organismos, Empresas dependentes.

3º.- Artigo 70.9 do Real Decreto 2568/86, do 28 de novembro, polo que se atribúe ao Pleno da Corporación Provincial a declaración de compatibilidade para o exercicio dunha segunda actividade no sector público ou privado.

4º.- Segundo o artigo 11 da Lei 53/84, do 26 de decembro e artigo 9 do Real Decreto 598/85, do 30 de abril, o persoal comprendido no seu ámbito de aplicación non poderá exercer, por si ou mediante substitución, actividades privadas, incluídas as de carácter profesional, sexan por conta propia ou baixo a dependencia ou ao servizo de Entidades ou particulares que se relacionen directamente coas que desenvolva o Departamento, Organismo ou Entidade onde estivese destinado. Exceptúanse da devandita prohibición as actividades particulares que, en exercicio dun dereito legalmente recoñecido, realicen para si os directamente interesados.

5º.- De acordo co disposto no artigo 12.2 da Lei 53/84, as actividades privadas que correspondan a postos de traballo que requiran a presenza efectiva do interesado durante un horario igual ou superior á metade da xornada semanal ordinaria de traballo nas Administracións Públicas soamente poderán autorizarse cando a actividade pública sexa unha das enunciadas nesta Lei como prestación a tempo parcial.

6º.- Tal e como sinala o artigo 14 da Lei 53/84, o exercicio de actividades profesionais, laborais, mercantís ou industriais fora das Administracións Públicas requirirá o previo recoñecemento de compatibilidade. A resolución motivada recoñecendo a compatibilidade ou declarando a incompatibilidade, que se ditará no prazo de dous meses, corresponde ao Ministerio da Presidencia, a proposta do Subsecretario do Departamento correspondente; ao órgano competente da Comunidade Autónoma ou ao Pleno da Corporación Local, previo informe, no seu caso, dos Directores dos Organismos, Entes e Empresas públicas.

Este recoñecemento de compatibilidade non poderá modificar a xornada de traballo e horario da interesada e quedará automaticamente sen efecto en caso de cambio de posto no sector público.

7º.- O artigo 16 da Lei 53/84, en redacción dada pola disposición final terceira do Real Decreto lexislativo 5/2015, de 30 de outubro, polo que se aproba o texto refundido da Lei do Estatuto Básico do Empregado Público, indica que non poderá autorizarse ou recoñecerse compatibilidade ao persoal funcionario, ao persoal eventual e ao persoal laboral cando as retribucións complementarias que teñan dereito a percibir do apartado b) do artigo 24 do presente Estatuto inclúan o factor de incompatibilidade ao retribuído



por arancel e ao persoal directivo, incluído o suxeito á relación laboral de carácter especial de alta dirección.

Así mesmo, o apartado 4 do citado precepto recolle de forma literal que "por excepción e sen prexuízo das limitacións establecidas nos artigos 1.º 3, 11, 12 e 13 da presente Lei, poderá recoñecerse compatibilidade para o exercicio de actividades privadas ó persoal que desempeñe postos de traballo que comporten a percepción de complementos específicos, ou concepto equiparable, cuxa contía non supere o 30 por 100 da súa retribución básica, excluídos os conceptos que teñan o seu orixe na antigüidade".

8º.- A actividade que desenvolve a interesada no Centro Príncipe Felipe non está incluída en ningún dos supostos que contempla o artigo 11 do RD para o non recoñecemento da compatibilidade.

9º.- A Disposición transitoria novena da Lei 2/2015, de 29 de abril, de emprego público de Galicia determina que entrementes non se introduza o complemento retributivo do posto de traballo previsto por esta lei, todas as referencias a este último se entenderán feitas ó complemento específico existente á entrada en vigor da mesma, destinado a retribuír as condicións particulares dalgúns postos de traballo en atención a súa especial dificultade técnica, dedicación, responsabilidade, incompatibilidade, perigosidade ou penosidade. En ningún caso poderá asignarse máis dun complemento específico a cada posto de traballo.

Así mesmo indica, no apartado dous, que entrementes non se produza a substitución do complemento específico mencionado no apartado anterior polo complemento de posto de traballo previsto pola presente lei, poderá recoñecerse, conforme ó disposto na normativa sobre incompatibilidades que resulte de aplicación, compatibilidade para o exercicio de actividades privadas ó persoal que desempeñe postos de traballo que comporten a percepción de complemento específico ou concepto equiparable, sempre que a súa contía non supere o trinta por cento da súa retribución básica, excluídos os conceptos que teñan o seu orixe na antigüidade.

No suposto de que a contía de tal complemento supere o trinta por cento referido, poderá concederse a compatibilidade sempre e cando a persoa interesada renuncie á percepción do complemento específico ou concepto equivalente.

CONCLUSIÓN

En base ós antecedentes e consideracións normativas citadas anteriormente PROPONSE conceder a DONA SUSANA MOSTEIRO FALCÓN, con efectos do 8 de setembro de 2025 e ata o 19 de outubro de 2025, a compatibilidade solicitada para o desempeño dun segundo posto de traballo no sector privado como cociñeira no Hotel Piñeiro, debendo implicar o posto de traballo no sector privado a presenza efectiva da interesada por un tempo inferior á metade da xornada semanal ordinaria de traballo na Deputación.



Como consecuencia, deixará de percibir o importe do complemento específico.”

Considerando o exposto no informe da xefa do Servizo de RRHH e Formación de data 12 de setembro de 2025, o Pleno, de conformidade co ditame da Comisión Informativa de Transparencia, Réxime Interno e Facenda ACORDA:

Conceder autorización á funcionaria interina, D^a. Susana Mosteiro Falcón con efectos do 8 de setembro de 2025 e ata o 19 de outubro de 2025, para compatibilizar o desempeño do seu posto de traballo como oficiala cociñeira adscrita ó Centro Príncipe Felipe, cunha segunda actividade no sector privado como cociñeira no Hotel Piñeiro, debendo implicar o posto de traballo no sector privado a presenza efectiva da interesada por un tempo inferior á metade da xornada semanal ordinaria de traballo na Deputación.

Como consecuencia, deixará de percibir o importe do complemento específico.”

Unha vez debatido o asunto e segundo o establecido nos artigos 32 da Lei 7/1985, de 2 de abril, reguladora das bases do réxime local, 52 do Regulamento orgánico da Deputación de Pontevedra e 126 do Real Decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das entidades locais, sométese a votación a proposta de acordo sobre a solicitude de Susana Mosteiro Falcón para o exercicio dunha segunda actividade no sector privado, asinada con data 15 de setembro de 2025 pola Xefa do Servizo de Recursos Humanos e Formación e polo Deputado Delegado da área de Asistencia aos Concellos, Transparencia e Administración Xeral.

O resultado da votación foi o seguinte:

- 1. Votos a favor: (9)**, do grupo provincial do Partido Popular.
- 2. Votos en contra: (0)**, ningún.
- 3. Abstencións: (8)**, sendo seis (6) do grupo provincial do PSdeG-PSOE, e dúas (2) do grupo provincial do BNG.

A Comisión Informativa de Transparencia, Réxime Interno e Facenda ditamina favorablemente a proposta de acordo sobre a solicitude dunha funcionaria interina que presta servizos no Centro Príncipe Felipe para compatibilizar o desempeño do seu posto de traballo co exercicio dunha segunda actividade no sector privado, cos votos a favor das Deputadas e Deputados do grupo provincial do Partido Popular e as abstencións dos Deputados e Deputadas dos grupos provinciais do PSdeG-PSOE e do BNG.



4. Modificación do réxime de dedicación dun cargo político pasando da dedicación parcial á exclusiva e á determinación das súas retribucións. (Exptes.- 2025062688 - 2024069258).

O Presidente da Comisión informa que a Presidencia efectuou con data 16 de setembro de 2025 unha proposición ao Pleno para modificar a relación de cargos políticos que teñen asignado o réxime de dedicación exclusiva e parcial para os efectos de pasar unha dedicación parcial do 85% a exclusiva. Esta nova dedicación parcial quedaría cunha retribución anual, incluído o 0,5% da revisión salarial, cifrada en 71.279,66 euros.

A continuación somete a debate a proposta de acordo que se indica a continuación, cuxo contido é o seguinte:

“Dada conta da Proposición da Presidencia de data 16 de setembro de 2025 na que propón o Pleno a modificación da relación de cargos políticos que teñen asignado o réxime de dedicación exclusiva e parcial para os efectos de pasar unha dedicación parcial do 85% a exclusiva, quedando esta última, incluído o 0,5% da revisión salarial, cunha retribución anual cifrada en 71.279,66 euros.

En virtude do disposto nos artigos 75 e 75 bis da Lei 7/85, de 2 de abril, reguladora das bases de réxime local (LRBRL), 225 da Lei 5/97, de 22 de xullo, de Administración local de Galicia, e 13 do Real decreto 2568/86, de 28 de novembro, polo que se aproba o regulamento de organización, funcionamento e réxime xurídico das entidades locais (ROF); o Pleno, de conformidade co ditame da Comisión Informativa de Transparencia, Réxime Interno e Facenda acorda:

Modificar o réxime de dedicación dun cargo político da Corporación Provincial, pasando de dedicación parcial do 85% a exclusiva, cunha retribución anual en 71.279,66 €.

Esta modificación terá efectos dende a data de aceptación do cargo.

O nomeamento para este cargo deberá ser aceptado expresamente, tal e como dispón o citado artigo 13 do ROF. De ser así terá que comunicarse esta circunstancia ó Pleno na seguinte sesión ordinaria.

O custo laboral total anual ascende a 71.279,66 €, en concepto de retribucións, e a 23.508,03 € en concepto de cota patronal á seguridade social, cantidades que se imputarán ás aplicacións orzamentarias 25/900.9120.100.00 e 25/900.9120.160.01.

Unha vez aprobado o cambio, corresponde ó Presidente o nomeamento do membro da Corporación que pasará a desempeñar o cargo a tempo parcial.



Este acordo será publicado na forma prevista no apartado 5 do artigo 75 da LRBRL, e no portal de transparencia da Deputación, en cumprimento do estipulado no artigo 8.1 f) da Lei 19/2013 de 9 de decembro.”

Unha vez debatido o asunto e segundo o establecido nos artigos 32 da Lei 7/1985, de 2 de abril, reguladora das bases do réxime local, 52 do Regulamento orgánico da Deputación de Pontevedra e 126 do Real Decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das entidades locais, sométese a votación a proposta de acordo sobre a modificación do réxime de dedicación dun cargo político pasando da dedicación parcial a exclusiva e á determinación das súas retribucións

O resultado da votación foi o seguinte:

- 1. Votos a favor: (9)**, do grupo provincial do Partido Popular.
- 2. Votos en contra: (0)**, ningún.
- 3. Abstencións: (8)**, sendo seis (6) do grupo provincial do PSdeG-PSOE, e dúas (2) do grupo provincial do BNG.

A Comisión Informativa de Transparencia, Réxime Interno e Facenda ditamina favorablemente a proposta de acordo sobre a modificación do réxime de dedicación dun cargo político pasando da dedicación parcial a exclusiva e á determinación das súas retribucións, cos votos a favor das Deputadas e Deputados do grupo provincial do Partido Popular e as abstencións dos Deputados e Deputadas dos grupos provinciais do PSdeG-PSOE e do BNG.

5. Aprobación inicial do expediente de modificación de créditos número 5/2025. (Exptes.- 2025062459 - 2025059573).

O Presidente da Comisión somete a debate a proposta de acordo sobre a aprobación inicial do expediente de modificación de créditos número 5/2025, asinada con data 16 de setembro de 2025 polo Xefe do Servizo de Orzamentos, Plans e Organismos e polo Deputado Delegado de Xestión Tributaria, Patrimonio e Formación e Emerxencias, cuxo contido é o seguinte:

“O Deputado delegado de Xestión Tributaria, Patrimonio, Formación e Emerxencias en virtude das delegacións acordadas na Resolución Presidencial nº 2025000361, de data 20 de xaneiro de 2025, propón ó Pleno a aprobación do expediente de modificación de crédito número 05/2025. Este expediente inclúe créditos extraordinarios (EXT.05/25) por



importe de 43.241.005,62 euros, suplementos de créditos (SUP.04/25) por importe de 20.859.143,22 euros e a modificación do Anexo II das bases de execución.

Resultando que a tramitación deste expediente está motivado pola necesidade de realizar gastos que non poden demorarse ata o exercicio seguinte por non existir consignación suficiente no estado de gastos do orzamento corrente, financiándose:

- Crédito extraordinario (EXT. 05/25), fináncianse con maiores ingresos dos exercicios correspondentes á liquidación definitiva da PIE 2023 (cesión impostos IRPF, IVE e HIDROCARBUROS liquidación 2023), maiores entregas a conta da PIE 2025 (maiores ingresos por cesión impostos IRPF, IVE 2025) e o resto con remanente líquido de tesourería para gastos xerais, tal e como se sinala no detalle do expediente.
- Os suplementos de créditos (SUP. 04/25), financiase por importe de 172.369,72 euros con baixas por anulación e o resto con aforro propio procedente de exercicios anteriores, é dicir, con remanente líquido de tesourería para gastos xerais.

Resultando que a Intervención emite informe de data 16 de setembro de 2025, no que indica que o expediente cumpre cos requisitos previstos na normativa de aplicación, tanto en relación cos gastos que se pretenden financiar como cos recursos que os financian e que a súa tramitación respecta o equilibrio orzamentario.

Considerando o disposto nos artigos 177, 179 e 180 do Real Decreto Legislativo 2/2004, de 5 de marzo, polo que se aproba o Texto refundido da Lei reguladora das Facendas Locais; nos artigos 34 a 38 e 40 a 42 do Real Decreto 500/1990, de 20 de abril, nos artigos 2,3,11,27 e demais concordantes da Lei Orgánica 2/2012, de 27 de abril de Estabilidade Orzamentaria e Sustentabilidade Financeira e nas bases de execución do orzamento, en canto a competencia e tramitación a seguir para a aprobación do expediente de modificación de crédito número 05/2025.

O Pleno, de conformidade co ditame favorable da Comisión de Transparencia, Réxime Interno e Facenda, acorda:

Primeiro: Aprobar o expediente de modificación de crédito número 05/2025 da Deputación de Pontevedra. Este expediente inclúe créditos extraordinarios (EXT.05/25) por importe de 43.241.005,62 euros e suplementos de créditos (SUP.04/25) por importe de 20.859.143,22 euros. O detalle do expediente e o seu financiamento é o seguinte:

1.- Créditos Extraordinarios “EXT. 05/25”:

APLICACIÓN	DENOMINACIÓN	IMPORTE
240-2419-120,51	Soldo func. interinos sen praza (2500004. PROXECTO ERASMUS+ 2025)_ P. EMPREGO	29.920,00 €
240-2419-120,52	Trienios func. interinos sen praza (2500004. PROXECTO ERASMUS+ 2025)_ P. EMPREGO	1.920,00 €
240-2419-120,53	Paga extra func. interinos sen praza (2500004. PROXECTO ERASMUS+ 2025)_ P. EMPREGO	6.320,00 €



240-2419-120,90	O. Retribucións, Melloras, I.T., (2500004. PROXECTO ERASMUS+ 2025)_ P. EMPREGO	640,00 €
240-2419-121,51	C. Destino Func. Interinos sen praza, (2500004. PROXECTO ERASMUS+ 2025)_ P. EMPREGO	19.600,00 €
240-2419-121,52	C. Específico Func. Interinos sen praza, (2500004. PROXECTO ERASMUS+ 2025)_ P. EMPREGO	19.600,00 €
240-2419-160,00	Seguridade Social, (2500004. PROXECTO ERASMUS+ 2025)_ P. EMPREGO	10.160,00 €
240-2419-224,03	Primas de seguros, (2500004. PROXECTO ERASMUS+ 2025)_ P. EMPREGO	25.440,00 €
240-2419-226,02	Publicidade e propaganda, (2500004. PROXECTO ERASMUS+ 2025)_ P. EMPREGO	1.600,00 €
240-2419-226,99	Outros gastos diversos, (2500004. PROXECTO ERASMUS+ 2025)_ P. EMPREGO	1.600,00 €
240-2419-227,06	Estudios e traballos técnicos, (2500004. PROXECTO ERASMUS+ 2025)_ P. EMPREGO	40.000,00 €
240-2419-230,20	Axudas de custo, (2500004. PROXECTO ERASMUS+ 2025)_ P. EMPREGO	800,00 €
240-2419-231,20	Locomoción, (2500004. PROXECTO ERASMUS+ 2025)_ P. EMPREGO	2.400,00 €
922-3340-632,01	EDIFICIOS E OU. CONSTRUCCIÓN, MELLORAS PATRIMONIO_CONTRATACIÓN (Convenio Xunta, melloras Cine Fraga)	81.005,62 €
942-3420-762,95	A CONCELLOS, PLAN DE INFRAESTRUTURAS DEPORTIVAS 2025, "PEID III" - COOPERACIÓN	8.000.000,00 €
942-9420-762,85	A CONCELLOS, PLAN P. EXTRAORDINARIA, PLAN EXTRA 2025 - COOPERACIÓN	35.000.000,00 €
	Total Créditos Extraordinarios...	43.241.005,62 €

Financiamento do expediente de Créditos Extraordinarios, EXT. 05/25:

Fináncianse con maiores ingresos do exercicio correspondentes a liquidación da participación nos tributos do estado 2023; os maiores ingresos a recibir polas entregas a conta na participación nos tributos do estado 2025 e o resto con aforro propio procedente de exercicios anteriores, é dicir, con remanente líquido de tesourería para gastos xerais, tal como se detalla na táboa seguinte.

Contabilizándose as seguintes operacións:

CONCEPTOS DE INGRESO	DENOMINACIÓN	IMPORTE
934-100,00	Cesión IRPF (Liquidación 2023)	606.614,28 €
934-100,00	Cesión IRPF (MAIORES ENTREGAS A CONTA 2025)	1.169.308,76 €
934-210,00	Cesión IVE (MAIORES ENTREGAS A CONTA 2025)	1.979.953,76 €
934-210,00	Cesión HIDROCARABUROS (MAIORES ENTREGAS A CONTA 2025)	42.552,36 €
934-420,10	F.C.F. INCREMENTO ENTREGAS A CONTA P.I.E. 2025	15.858.739,09 €
934-420,11	F.C.F. LIQUIDACIÓN P.I.E. 2023 (maiores ingresos)	10.975.692,66 €
931-870,01	Remanente de Tesourería - Aplicado para financiar Créditos Extraordinarios (EXT. 05/25)...	12.608.144,71 €
	TOTAL INGRESOS..	43.241.005,62 €

2.- Suplementos de Crédito "SUP. 04/25":



APLICACIÓN	DENOMINACIÓN	IMPORTE
231-2311-789.00	INVESTIMENTOS ENTIDADES DE INICIATIVA SOCIAL_BENESTAR SOCIAL (Convocatoria subvencións obras centros de iniciativa social)	600.000,00 €
333-3330-212.00	REPARACIÓNS EDIFICIOS E OUTRAS CONSTRUCIÓNS_MUSEO	150.000,00 €
333-3330-623.02	INSTALACIÓNS TÉCNICAS_MUSEO.	90.000,00 €
340-3410-489.02	A FAMILIAS E INST. SEN FINS LUCRO, ESCOLAS DEPORTIVAS_DEPORTES (Á Fundación Celta de Vigo)	49.000,00 €
340-3410-789.05	A ENT. SEN FINS DE LUCRO, EQUIP, VEHICULOS REMOLQUES E OUTROS_DEPORTES (Adquisición ou adaptación de medios de transporte e mobilidade)	300.000,00 €
410-4190-489.01	OUTRAS TRANSFERENCIAS, VARIAS_MEDIO AMBIENTE (Achega á Asociación Gandeira Rubia Galega do País, "XIV Feira da Vaca Rubia Galega do País")	3.000,00 €
410-4120-622.03	OUTRAS TRANSFERENCIAS, VARIAS_MEDIO AMBIENTE (Nova nave para "gando lactante")	114.400,00 €
433-3361-226.06	ESTUDIOS E TRABALLOS TECNICOS (XACEMENTOS)_TURISMO (Para sondaxes arqueolóxicas no recinto de Monterreal, Baiona)	57.969,72 €
931-0110-913.00	AMORTIZACIÓN PRÉSTAMOS, FORA DO SECTOR PUBLICO_INTERVENCIÓN (Amortización Extraordinaria Débeda "BBVA: 14.954.773,50€"; "B. Sabadell: 4.500.000,00€")	19.454.773,50 €
942-4590-489.07	A COMUNIDADES VECIÑALES, G. CORRENTE (NOVAQUA)_COOPERACIÓN	40.000,00 €
	Total Suplementos de Créditos...	20.859.143,22 €

Financiamento do expediente de Suplementos de Créditos 04/25:

1. Por importe de 57.969,72 € con destino a "sondaxes arqueolóxicas no recinto de Monterreal - Baiona", con baixas por anulación da aplicación 25/923-9225-462.11, do Centro Xestor SAIM, por xestionarse o expediente dende o proxecto XACEMENTOS (Centro Xestor Turismo); respecto do suplemento da aplicación 25/410-4120-622.03 por importe de 114.400,00 €, con baixas de créditos na aplicación 25/410-4190-632.01/2023 non utilizados.

Contabilizándose as seguintes operacións:

APLICACIÓN	DENOMINACIÓN	IMPORTE
410-4190-632.01/2023	EDIFICIOS E OUTRAS CONSTRUCIÓNS, MELLORAS_MEDIO AMBIENTE (Edificio de apeiros)	-114.400,00 €
923-9225-462.11	A CONCELLOS, CONVENIOS SONDEXES ARQUEOLÓXICAS_SAIM	-57.969,72 €
	Total Baixas por Anulacións...	-172.369,72 €

2. O resto financíase con aforro propio procedente de exercicios anteriores, é dicir, con remanente líquido de tesourería para gastos xerais.

Contabilizándose as seguintes operacións:

CONCEPTOS DE INGRESO	DENOMINACIÓN	IMPORTE
931-870,02	Remanente de Tesourería - Aplicado para financiar Suplementos de Crédito (SUP. 05/25)...	20.686.773,50 €
	TOTAL...	20.686.773,50 €



Resumo do expediente:

<i>TOTAL SUPLEMENTOS...</i>	<i>20.859.143,22 €</i>
<i>TOTAL CRÉDITOS EXTRAORDINARIOS...</i>	<i>43.241.005,62 €</i>
<i>TOTAL BAIXAS POR ANULACIÓN...</i>	<i>-172.369,72 €</i>
<i>SUMA...</i>	<i>63.927.779,12 €</i>

O Resumo das modificacións por capítulos son as seguintes:

ORZAMENTO DE INGRESOS

<i>Capítulo 1º Impostos directo.</i>	<i>1.775.923,04 €</i>
<i>Capítulo 2º Impostos indirectos.</i>	<i>2.022.506,12 €</i>
<i>Capítulo 3º Taxas e outros ingresos.</i>	<i>0,00 €</i>
<i>Capítulo 4º transferencias correntes.</i>	<i>26.834.431,75 €</i>
<i>Capítulo 5º Ingresos patrimoniais.</i>	<i>0,00 €</i>
<i>Capítulo 6º Alleamento de investimentos reais.</i>	<i>0,00 €</i>
<i>Capítulo 7º Transferencias de capital.</i>	<i>0,00 €</i>
<i>INGRESOS NON FINANCEIROS...</i>	<i>30.632.860,91 €</i>
<i>Capítulo 8º Activos financeiros.</i>	<i>33.294.918,21 €</i>
<i>Capítulo 9º Pasivos financeiros.</i>	<i>0,00 €</i>
<i>INGRESOS FINANCEIROS...</i>	<i>33.294.918,21 €</i>
<i>TOTAL VARIACIÓNS POR CAPÍTULO...</i>	<i>63.927.779,12 €</i>

ORZAMENTO DE GASTOS.

<i>Capítulo 1º Gastos de persoal.</i>	<i>88.160,00 €</i>
<i>Capítulo 2º Gastos en bens correntes e servizos.</i>	<i>279.809,72 €</i>
<i>Capítulo 3º Gastos financeiros.</i>	<i>0,00 €</i>
<i>Capítulo 4º Transferencias correntes.</i>	<i>34.030,28 €</i>
<i>Capítulo 6º Inwestimentos reais.</i>	<i>171.005,62 €</i>
<i>Capítulo 7º Transferencias de capital.</i>	<i>43.900.000,00 €</i>
<i>GASTOS NON FINANCEIROS...</i>	<i>44.473.005,62 €</i>
<i>Capítulo 8º Activos financeiros.</i>	<i>0,00 €</i>
<i>Capítulo 9º Pasivos financeiros.</i>	<i>19.454.773,50 €</i>
<i>GASTOS FINANCEIROS...</i>	<i>19.454.773,50 €</i>
<i>TOTAL VARIACIÓNS POR CAPÍTULO...</i>	<i>63.927.779,12 €</i>

3.-Modificación do Anexo II das bases de execución, engadindo como subvencións nominativas, a seguinte:



410- MEDIO AMBIENTE

APLICACIÓN/CIF	BENEFICIARIO/ FINALIDADE	CRÉDITO FINAL	Obxecto e finalidade
24/410.4190.489.01	OUTRAS TRANSFERENCIAS, VARIAS _ MEDIO AMBIENTE	75.000,00 €	
G75325498	Asociación Gandeira Rubia Galega do País	3.000,00 €	XIV feira da vaca rubia galega do país

Onde se establecía:

340- DEPORTES

APLICACIÓN/CIF	BENEFICIARIO/ FINALIDADE	CRÉDITO INICIAL	Obxecto e finalidade
24/340.3410.489.02	A FAMILIAS E ENTIDADES SEN FINS DE LUCRO, ESCOLAS DEPORTIVAS	1.219.000,00 €	
G36810042	Fundación Celta de Vigo	40.000,00 €	Realización de proxectos de carácter social no deporte

Modifícase polo seguinte:

340- DEPORTES

APLICACIÓN/CIF	BENEFICIARIO/ FINALIDADE	CRÉDITO FINAL	Obxecto e finalidade
24/340.3410.489.02	A FAMILIAS E ENTIDADES SEN FINS DE LUCRO, ESCOLAS DEPORTIVAS	1.268.000,00 €	
G36810042	Fundación Celta de Vigo	89.000,00 €	Realización de proxectos de carácter social no deporte

Segundo: Este expediente de modificación de créditos número 05/2025 que inclúe créditos extraordinarios (EXT.05/25) por importe de 43.241.005,62 euros e suplementos de créditos (SUP.04/25) por importe de 20.859.143,22 euros, mais as modificacións do Anexo II das Bases de execución do orzamento, exporase ao público para os efectos de reclamacións, por un período de quince días hábiles, contados dende o día seguinte ao da publicación do anuncio no Boletín Oficial da Provincia de Pontevedra (BOPPO).

As reclamacións, reparos ou observacións que se presenten serán estudados, no seu caso, polos servizos técnicos da Deputación de Pontevedra e posteriormente pola



Comisión informativa de Transparencia, Réxime Interno e Facenda, que formulará ao Pleno a proposta de aprobación definitiva deste expediente.

Este acordo de aprobación inicial do expediente de modificación de créditos número 05/2025, entenderase definitivamente aprobado no caso de que no prazo de exposición pública non se formulasen reclamacións contra o mesmo.”

Unha vez debatido o asunto e segundo o establecido nos artigos 32 da Lei 7/1985, de 2 de abril, reguladora das bases do réxime local, 52 do Regulamento orgánico da Deputación de Pontevedra e 126 do Real Decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das entidades locais, sométese a votación a proposta de acordo sobre a aprobación inicial do expediente de modificación de créditos número 5/2025, asinada con data 16 de setembro de 2025 polo Xefe do Servizo de Orzamentos, Plans e Organismos e polo Deputado Delegado de Xestión Tributaria, Patrimonio e Formación e Emerxencias.

O resultado da votación foi o seguinte:

1. **Votos a favor: (9)**, do grupo provincial do Partido Popular.
2. **Votos en contra: (0)**, ningún.
3. **Abstencións: (8)**, sendo (6) do grupo provincial do PSdeG-PSOE e dúas (2) do grupo provincial do BNG.

A Comisión Informativa de Transparencia, Réxime Interno e Facenda ditamina favorablemente a proposta de acordo sobre a aprobación inicial do expediente de modificación de créditos número 5/2025, cos votos a favor das Deputadas e Deputados do grupo provincial do Partido Popular, e coas abstencións das Deputadas e Deputados dos grupos provinciais do PSdeG-PSOE e do BNG.

6. **Moción do Grupo Provincial Socialista (PSdeG-PSOE) para esixir da Deputación que inste á Xunta de Galicia a asumir a xestión e o financiamento íntegros dos grupos de emerxencias supramunicipais (GES). (Expte.-2025062692).**



A voceira do grupo provincial do PSdeG-PSOE, Dona Ana Laura Iglesias González, presentou o día 16 de setembro de 2025 co número de rexistro WEB2025065016 unha moción para esixir da Deputación que inste á Xunta de Galicia a asumir a xestión e o financiamento íntegros dos Grupos de Emerxencias Supramunicipais (GES), cuxo contido é o seguinte:

“MOCIÓN DO GRUPO PROVINCIAL SOCIALISTA PARA ESIXIR DA DEPUTACIÓN QUE INSTE Á XUNTA DE GALICIA A ASUMIR A XESTIÓN E O FINANCIAMENTO ÍNTEGROS DOS GRUPOS DE EMERXENCIAS SUPRAMUNICIPAIS (GES)

EXPOSICIÓN DE MOTIVOS

Os Grupos de Emerxencias Supramunicipais (GES), creados en 2013 ao abeiro dos convenios de colaboración entre a Xunta de Galicia, as deputacións e os concellos, naceron para reforzar a resposta rápida en zonas sen parques comarcais de bombeiros. Segundo a Lei 5/2007, do 7 de maio, de Emerxencias de Galicia, e a Lei 17/2015, do 9 de xullo, do Sistema Nacional de Protección Civil, a Comunidade Autónoma dispón de competencias de desenvolvemento e execución nesta materia (art. 27.14 do Estatuto de Autonomía de Galicia) e, polo tanto, pode asumir directamente a xestión e o financiamento dos servizos que constitúen a primeira resposta fronte ás emerxencias.

O modelo actual presenta graves carencias estruturais: medios materiais insuficientes, vehículos envellecidos, instalacións mellorables e persoal escaso con condicións laborais que cómpre dignificar. Non se trata de casos illados. O propio GES de Sanxenxo desenvolve a súa actividade con EPIs e equipamentos de protección que non se renovan ao ritmo preciso; e outros intentos frustrados de creación de GES en concellos como Moraña ou A Lama deixan zonas enteiras da provincia sen cobertura, nomeadamente Ponte Caldelas, Campolameiro ou Cerdedo-Cotobade, territorios con alto risco de incendios forestais.

Esta situación vén determinada polo modelo de convenios actualmente vixente, no que a Xunta delega a xestión e parte do financiamento nas deputacións e nos concellos, sen asumir de xeito directo nin a responsabilidade plena nin a planificación integral. O resultado é un mapa desigual, con zonas “escuras” sen cobertura real, e servizos que dependen da capacidade económica e organizativa de cada concello anfitrión. Ademais, a ausencia de criterios públicos e transparentes no reparto de recursos materiais provoca agravios comparativos: concellos sen GES reciben vehículos mentres outros con medios obsoletos seguen agardando.



Cómpre lembrar que o Tribunal Superior de Xustiza de Galicia, en sentenzas recentes sobre cadros de persoal dos GES, recoñeceu a necesidade de reforzar os efectivos, establecendo mínimos por quenda que a día de hoxe non se cumpren en todos os grupos.

En consecuencia, non está en cuestión a utilidade nin a necesidade dos GES, senón a insuficiencia do modelo actual de xestión. É imprescindible que a Administración autonómica, no exercicio das súas competencias en materia de emerxencias, asuma de forma directa e integral tanto a xestión como o financiamento, garantindo unha rede profesionalizada, dotada de medios e que cubra todo o territorio de maneira equilibrada.

Os concellos non deben asumir responsabilidades e competencias que corresponden á Xunta de Galicia, e cómpre configurar un sistema de emerxencias profesional e centralizado que dea resposta efectiva a todo o territorio con base en criterios técnicos e profesionais, especialmente en función dos tempos de resposta.

Diante de todo isto, o Pleno insta á Deputación ao cumprimento dos seguintes

ACORDOS:

- 1. Instar á Xunta de Galicia a asumir de forma directa e íntegra a xestión e o financiamento dos Grupos de Emerxencias Supramunicipais (GES), integrándoos plenamente no sistema autonómico de emerxencias.*
- 2. Instar á Xunta de Galicia a elaborar, no marco dese novo modelo, un plan territorial de emerxencias baseado en isócronas de resposta, que defina as localizacións, os recursos humanos e materiais e estableza criterios públicos, obxectivos e transparentes de reparto para garantir unha cobertura equilibrada e efectiva en todo o territorio, con tempos máximos de intervención homoxéneos.*

Sometida a votación a moción do grupo provincial do PSdeG-PSOE, para esixir da Deputación que inste á Xunta de Galicia a asumir a xestión e o financiamento íntegros dos Grupos de Emerxencias Supramunicipais (GES), obtívose o seguinte resultado:

- 1. Votos a favor: (8)**, sendo seis (6) do grupo provincial do PSdeG-PSOE e (2) do grupo provincial do Bloque Nacionalista Galego.
- 2. Votos en contra: (9)**, do grupo provincial do Partido Popular.
- 3. Abstencións: (0)**, ningunha.



A Comisión Informativa de Transparencia, Réxime Interno e Facenda ditamina desfavorablemente a moción do Grupo Provincial do PSdeG-PSOE, para esixir da Deputación que inste á Xunta de Galicia a asumir a xestión e o financiamento íntegros dos Grupos de Emerxencias Supramunicipais (GES), cos votos a favor das Deputadas e Deputados dos grupos provinciais do PSdeG-PSOE e do BNG e cos votos en contra das Deputadas e Deputados do grupo provincial do Partido Popular.

7. Moción do Grupo Provincial Socialista (PSdeG-PSOE) para esixir da Deputación que inste á Xunta de Galicia a mellora do servizo de axuda no fogar e outros acordos complementarios. (Expte.- 2025062694).

A voceira do grupo provincial do PSdeG-PSOE, Dona Ana Laura Iglesias González, presentou o día 16 de setembro de 2025 co número de rexistro WEB2025065017 unha moción para esixir da Deputación que inste á Xunta de Galicia a mellora do servizo de axuda no fogar e outros acordos complementarios, cuxo contido é o seguinte:

“MOCIÓN DO GRUPO PROVINCIAL SOCIALISTA PARA ESIXIR DA DEPUTACIÓN QUE INSTE A XUNTA DE GALICIA MELLORA DO SERVIZO DE AXUDA NO FOGAR E OUTROS ACORDOS COMPLEMENTARIOS.

EXPOSICIÓN DE MOTIVOS

As e os socialistas galegos levamos desde o inicio desta lexislatura solicitando que se cumpra a Lei de Servizos Sociais de Galicia do ano 2008. Nela fálase da elaboración dun Plan Estratéxico que sería laborado polo Goberno da Xunta de Galicia coa fin de, cada 6 anos, ter unha planificación conxunta entre concellos, goberno autónomo e técnicos.

A realidade é que esta obriga nunca se cumpriu, cando noutras autonomías están xa finalizando o segundo plan estratéxico. A realidade tamén é que desde hai 16 anos, e tras sucesivos gobernos do Partido Popular, nin Feijóo nin Rueda foron quen de liderar os Servizos Sociais de Galicia. Diferentes conselleiros e conselleiras de Asuntos Sociais non fixeron máis que asumir as políticas austericidas do Goberno de Mariano Rajoy. Ao tempo que nin planificaban as necesidades dunha sociedade envellecida, nin escoitaban as demandas dos concellos que se vían e se ven abocados a ser os que soportan as demandas de miles de galegas e galegos que, tendo dereito ás prestacións da Lei de Dependencia, transitan coas súas necesidades de coidados por un labirinto de valoracións e listas de espera na que agardan anos a ser atendidos.

E precisamente esa falla de planificación levou a que os concellos de Galicia tiveran que dar resposta a través do Servizo de Axuda no Fogar á inxente demanda que suscitaba a Lei de Dependencia, á marxe do propio servizo de axuda municipal.



O que vén de acontecer co asasinato o 29 de xullo de 2025 de Teresa de Jesús Rodríguez, traballadora do SAF no Concello de Porriño que pedira o día antes non acudir a prestar o servizo no domicilio debido ao acoso sufrido polo usuario que acabou coa súa vida; é unha terrible e cruel consecuencia do abandono e a saturación que padece o servizo en toda Galicia.

O SAF é hoxe en día un traballo feminizado e precarizado polo que ten un marco amplo no que poden ser vulnerados os dereitos laborais das traballadoras.

Empresas que estiran ao máximo as quendas e libranzas das traballadoras, moitas delas rexeitan pedir baixas polo precario salario que chegarían a percibir. E mesmo ven como se incumpre a avaliación de riscos laborais obrigatoria en tódolos domicilios onde se presta servizo. O acontecido en Porriño é un terrible exemplo de como levar a situación ao límite.

O servizo está colapsado, ao igual que outros servizos e prestacións da Lei de Dependencia. A lexislación sobre o mesmo está estruturada a través de tres normativas:

- A Lei de Servizos Sociais do ano 2008, que precisa ser actualizada, e que establece a carteira de servizos sociais, entre eles o SAF como unha prestación de carácter esencial que ten que ofrecer en todo o territorio.*
- O Decreto Autonómico 99/2012 que estima que as entidades locais son entidades titulares do servizo no territorio.*
- E a orde de axuda no fogar do 2008 que regula o servizo. Así como reformas normativas, a última de setembro de 2024, que non están sendo aplicadas na súa totalidade.*

Así pois, a Xunta de Galicia é a que crea e establece a carteira de servizos e a que indica que son os concellos os que teñen que efectuala. Ten a obriga de inspección, financiación e a planificación da regulación normativa que está totalmente desfasada e a coordinación coa administración local.

Pero a realidade é que o SAF é o recurso de dependencia que máis elixen as galegas e galegos, pero está sendo empregado como un “caixón desastre”, de xeito que tamén palía a longa espera da Lei de Dependencia (máis dun ano como mínimo).

Deste modo, bloquéase o sistema producindo esperas longas e ofrecendo unha solución errónea ao usuario e ao seu entorno.

A Deputación de Pontevedra ten competencias en materia de servizos sociais, segundo o previsto na Lei 13/2008, do 3 de decembro, de servizos sociais de Galicia, no seu artigo 63, así como no Decreto 99/2012, do 16 de marzo, polo que se regulan os servizos sociais comunitarios e o seu financiamento, no seu artigo 31 sobre as competencias das deputacións provinciais, que se concretan na prestación da asistencia económica, técnica



e xurídica ós concellos, especialmente ós de menos de 20.000 habitantes, na implantación e xestión dos servizos sociais comunitarios municipais.

Asemade, os concellos véñen prestando este servizo a modo de “parche” debido, basicamente, á ausencia dese Plan Estratéxico establecido na Lei de Servizos Sociais e que é unha obriga do goberno da Xunta de Galicia e polo que levamos esperando 16 anos.

Diante de todo isto, o Pleno insta á Deputación ao cumprimento dos seguintes

ACORDOS:

1. *En acordo coa FEGAMP, esixir a aplicación do Real Decreto 893/2024, de 10 de setembro no que se introducen as seguintes modificacións:*
 - *Incluír expresamente ao persoal de axuda a domicilio no réxime xeral de prevención de riscos laborais.*
 - *Avaliación de riscos laborais obrigatoria en todos os domicilios onde se presta o servizo.*
 - *As avaliaciós deben ser presenciais e adaptadas ás condicións do fogar e da persoa usuaria.*
 - *Implantación de medidas preventivas: dotación de medios mecánicos, descanso entre servizos, dobre persoal, etc.*
 - *Recoñecemento médico gratuíto como mínimo cada tres anos.*
 - *Obriga de formación preventiva durante a xornada ou compensada.*
 - *Protocolo contra o acoso obrigatorio.*
2. *Constitución, nun prazo máximo de dous meses, da mesa técnica de Dependencia para que os responsables políticos e os Colexios Profesionais do sector acorden un plan de actuación que solvente con urxencia, e coa planificación a futuro, unha coordinación e racionalidade sobre a prestación de servizos e a concesión dos dereitos tanto das persoas traballadoras como usuarias.*
3. *A creación, nun prazo máximo de tres meses, dun Observatorio sobre o Sistema da Dependencia en Galicia no poidan obterse datos sistemáticos da prestación do SAF.*
4. *A elaboración inmediata dun Plan Estratéxico de Servizos Sociais tal e como recolle a Lei de Servizos Sociais de Galicia, de forma que os servizos sociais comunitarios poidan actuar de xeito coordinado e conforme aos servizos que lle son propios.*
5. *Incrementar o prezo por hora do cofinanzamento para o Servizo de Axuda ao Fogar correspondente á Deputación de Pontevedra para os Concellos de menos de*



20.000 habitantes e instar á Xunta de Galicia a incrementar tamén o prezo hora da financiación correspondente á subvención do Plan Concertado.”

Sometida a votación a moción do grupo provincial do PSdeG-PSOE, para esixir da Deputación que inste á Xunta de Galicia a mellora do servizo de axuda no fogar e outros acordos complementarios, obtívose o seguinte resultado:

1. **Votos a favor: (8)**, sendo seis (6) do grupo provincial do PSdeG-PSOE e (2) do grupo provincial do Bloque Nacionalista Galego.
2. **Votos en contra: (9)**, do grupo provincial do Partido Popular.
3. **Abstencións: (0)**, ningunha.

A Comisión Informativa de Transparencia, Réxime Interno e Facenda ditamina desfavorablemente a moción do Grupo Provincial do PSdeG-PSOE, para esixir da Deputación que inste á Xunta de Galicia a mellora do servizo de axuda no fogar e outros acordos complementarios, cos votos a favor das Deputadas e Deputados dos grupos provinciais do PSdeG-PSOE e do BNG e cos votos en contra das Deputadas e Deputados do grupo provincial do Partido Popular.

8. *Moción do Grupo Provincial do Partido Popular (PP) relativa á solicitude ao Goberno de España da adopción de medidas para a revitalización do Aeroporto de Peinador (Vigo). (Expte.-2025062762).*

O voceiro do grupo provincial do Partido Popular, D. Jorge Cubela López, presentou o día 16 de setembro de 2025 co número de rexistro 2025017790 unha moción para solicitar ao Goberno de España a adopción de medidas para a revitalización do Aeroporto de Peinador (Vigo), cuxo contido é o seguinte:

“MOCIÓN RELATIVA Á SOLICITUDE AO GOBERNO DE ESPAÑA DA ADOPCIÓN DE MEDIDAS PARA A REVITALIZACIÓN DO AEROPORTO DE PEINADOR (VIGO) QUE PRESENTA O GRUPO PROVINCIAL DO PARTIDO POPULAR NA DEPUTACIÓN DE PONTEVEDRA conforme ao previsto no Real Decreto 2568/1986, do 28 de novembro, polo que se aproba o Regulamento de Organización, Funcionamento e Réxime Xurídico das Entidades Locais, para elevar ao Pleno a seguinte proposta que trae a súa causa na seguinte:



EXPOSICIÓN DE MOTIVOS

O aeroporto de Peinador (Vigo) está a padecer nos últimos anos un proceso de deterioro nos seus servizos, frecuencias e funcionamento que está a mermar a súa utilidade como un sistema eficiente de transporte para os 950.000 cidadáns da provincia, tal e como revelan as cifras anuais de usuarios.

Esta situación entendemos que é responsabilidade principalmente de Aeropuertos Españoles y Navegación Aérea (AENA), entidade pública empresarial adscrita ao Ministerio de Transportes y Movilidad Sostenible, pola súa falta de implicación, compromiso e investimentos para o axeitado desenvolvemento do único aeroporto da provincia.

De feito, recentemente o Goberno de España, que foi o que creou a Comisión de Coordinación de Aeroportos de Galicia, que convoca as súas sesións e que preside este grupo de traballo, deixou exclusivamente en mans da Xunta e dos municipios a consecución de frecuencias para estas instalacións cando tiña a obriga, como titular da instalación, de liderar este proceso.

Pero, de entre os tres aeroportos galegos, o de Peinador é o que presenta as cifras máis baixas de viaxeiros malia pertencer á cidade máis poboada e importante de Galicia, pola política de absoluto abandono de AENA e do Ministerio de Transportes con esta instalación aeroportuaria e tamén, hai que dicilo, pola errática e inconsistente acción do goberno local de Vigo a través de millonarios contratos de promoción turística ás compañías que non teñen servido para consolidar nin unha soa ruta.

Así, Peinador pechou o pasado ano con 1.058.529 pasaxeiros -tendo en conta que estivo pechado 25 días en maio por obras-, o que supón un estancamento con respecto aos 1.136.157 do ano 2023 e incluso, desbotando o período 2020-2022 polos efectos da pandemia, aos 1.129.689 do exercicio 2018. Ademais, estas cifras están moi alonxadas dos 1.405.968 do récord do ano 2007.

Sen embargo, o declive ao que AENA está a someter ao aeroporto vigués plásmase na redución de voos, que pasaron de 14.866 a só 11.515 no pasado 2024. É dicir, cada día hai maiores niveis de ocupación dos avións, o que demostra o interese en empregar este medio de transporte, pero a oferta redúcese paseniñamente e as perspectivas de futuro son aínda peores tras a anunciada marcha de Ryanair.

Seguindo cos datos que reflicten o retroceso do aeroporto de Vigo, cómpre sinalar que as mercadorías desplomáronse das 1.065 toneladas de carga desprazadas en 2018 a só 315 no pasado ano.

Así, Peinador caeu un 6,8% en usuarios no ano anterior, caendo do 22^o ao 24^o posto no ranking de España (confirmado por 48 aeroportos) e ao 32^o en operacións comerciais, mentres Santiago ocupa o posto 16^o e A Coruña o 20^o.



E seguindo con este declive, os 11.515 voos que operaron en 2024 supuxeron un retroceso do 22,5%, o que supón a maior caída de toda España nun contexto xeralizado de subas de frecuencias, mentres que o desprazamento de mercadorías perdeu ata un 61%, un desplome que, desgrazadamente, tamén é o maior de todo o país.

Paralelamente, a decisión de Ryanair de cancelar a súas operacións en Peinador a partir do vindeiro 1 de xaneiro pon en evidencia, unha vez máis, a errática política aeroportuaria do goberno local que logo de 18 anos deixará unha terminal baleira de conexións internacionais e cada vez con menos voos domésticos.

De feito, a marcha da compañía irlandesa deixará a Peinador con só catro destinos: Gran Canaria, Tenerife, Madrid e Barcelona. Este último destino, por certo, foi tamén operado por Ryanair por conta e risco ata a súa decisión de deixar de operalo o pasado 1 de abril por mor das taxas que cobra AENA nas terminais rexionais e que están en ascenso, sendo un dos principais puntos do conflito e do problema.

Unha política de AENA, empresa que conta co Estado como socio maioritario, que está máis centrada en maximizar os seus beneficios económicos, máis de 1.900 millóns de euros o pasado ano, que en equilibrar o territorio aeroportuario español, potenciando aos grandes aeroportos fronte ás terminais rexionais. O resultado, xa que logo, é a discriminación de territorios e terminais, nomeadamente Vigo e o seu aeroporto.

Neste senso, cómpre lembrar que as competencias no tráfico aéreo e os aeroportos españois correspóndelle ao Estado e non ás comunidades autónomas nin aos concellos. É o goberno central o que debe levar a cabo unha estratexia que aposte polos aeroportos rexionais mediante unha política de taxas aeroportuarias atractiva.

É por iso que o Goberno de España e AENA deben rectificar a súa política estéril por unha que, lonxe de condenar aos aeroportos rexionais a quedar sen apenas voos, sexa quen de captar novas aeroliñas que os reforcen cunhas taxas máis competitivas.

A resposta, xa que logo, non pode ser seguir deixando que concellos como Vigo continúen a malgastar cartos públicos en contratos con empresas que unha vez rematado o seu compromiso, abandonan a cidade. De feito, hoxe Peinador ten menos voos que nunca froito da mala xestión deste goberno municipal, que non quere delegar en expertos en materia aeroportuaria.

Precisamente o asesoramento profesional pode ser a clave para a terminal olívica, á que se lle presenta unha oportunidade ante a fuxida de Ryanair de Galicia. Coa súa marcha polo aumento das taxas, Lavacolla vai perder rutas que pode atraer Vigo aproveitando o seu peso poboacional.

Deste xeito, desde o PP Provincial entendemos que o principal problema que ten o aeroporto de Peinador radica na perda constantes de frecuencias e de destinos e que actualmente apenas oferta un total de sete posibilidades fixas (Londres, Madrid, Barcelona, Valencia, Palma, Gran Canaria e Tenerife) e pasará a ter apenas catro en 2026.



E todo elo segue a ter efectos nefastos nas primeiras cifras deste ano, posto que o aeroporto vigués presenta datos negativos habitualmente e pechou agosto, o mes con máis demanda do ano, con 111.611 viaxeiros tras caer un 4,4% con respecto ao mesmo período do ano anterior.

Deste xeito, a terminal viguesa atópase cun escenario de redución de voos e frecuencias, recortes de persoal e servizos sen que se tomen medidas por parte dos responsables aeroportuarios estatais por medio da adopción de políticas e medidas que permitan incrementar a oferta e os destinos para rendibilizar o aeroporto de Peinador e ofrecer aos cidadáns un sistema de transporte atractivo, eficiente e eficaz en termos económicos, sociais e turísticos.

Pola contra, e segundo o manifestado polos representantes do Goberno de España no pasado mes de maio, a súa intención é deixar en mans da Xunta e dos concellos o incremento de liñas malia non ser da súa competencia, posto que, como manifestou o Goberno galego, a el e aos municipios correspóndelle a promoción turística, pero logo cada persoa é libre de escoller o medio de transporte para o seu desprazamento ata o destino.

E nesta situación, desde o PP Provincial tamén temos que lamentar que, no marco da caída de pasaxeiros e mercadorías e o deterioro do aeroporto vigués polas decisións do Goberno de España, o Concello de Vigo siga sen defender axeitadamente a única terminal da provincia e non eleve as xustas esixencias e demandas para refrotalo ante os responsables de AENA e Transportes e se limite a culpabilizar á Xunta no marco da súa habitual política de confrontación cando, ademais, non se trata da súa competencia.

Por todo elo, desde o Partido Popular cremos que se debe trasladar a AENA e ao ministerio a necesidade de que implementen as medidas necesarias para que o aeroporto de Peinador incremente voos, destinos e frecuencias, que cremos que é onde está a clave para un futuro repunte, co obxectivo de ofrecer unha alternativa de transporte eficaz aos vigueses e demais cidadáns da provincia.

Por todo iso, o Grupo Provincial do Partido Popular na Deputación de Pontevedra presenta a seguinte:

PROPOSTA DE ACORDOS

1^o- Demandar ao Goberno de España e AENA que exerzan as súas competencias para potenciar aos medianos e pequenos aeroportos, nomeadamente Peinador, a través dun traballo activo de captación de novas rutas.

2^o- Instar ao Goberno de España e AENA a rectificar a súa estratexia e manter unha política de taxas aeroportuarias que faga viables e atractivas as operacións das aeroliñas nos aeroportos periféricos, como é o caso de Peinador en Vigo.



3^o - Solicitar ao Concello de Vigo, principalmente ao alcalde, Abel Caballero, e ao goberno local, a que se involucre na defensa do Aeroporto de Peinador ante as administracións e empresas estatais competentes para garantir que os cidadáns e o tecido empresarial da cidade e da contorna metropolitana dispoñan dunha oferta axeitada e ampla de conexión, alomenos, con diversos destinos do resto de España.”

Sometida a votación a moción do grupo provincial do Partido Popular para solicitar ao Goberno de España a adopción de medidas para a revitalización do Aeroporto de Peinador (Vigo), obtívose o seguinte resultado:

- 1. Votos a favor: (9)**, do grupo provincial do Partido Popular.
- 2. Votos en contra: (0)**, ningún.
- 3. Abstencións: (8)**, sendo seis (6) do grupo provincial do PSdeG-PSOE e dúas (2) do grupo provincial do Bloque Nacionalista Galego.

A Comisión Informativa de Transparencia, Réxime Interno e Facenda ditamina favorablemente a moción do grupo provincial do Partido Popular para solicitar ao Goberno de España a adopción de medidas para a revitalización do Aeroporto de Peinador (Vigo), cos votos a favor das Deputadas e Deputados do grupo provincial do Partido Popular, e coas abstencións das Deputadas e Deputados dos grupos provinciais do PSdeG-PSOE e do BNG.

9. *Dar conta do informe da Intervención sobre o período medio de pago a provedores correspondente ó mes de agosto de 2025. (Exptes.- 2025062460 - 2025061277).*

A Intervención elaborou un informe do período medio de pago a provedores da Deputación de Pontevedra, da Escola Universitaria de Enfermería, do Consorcio Provincial Contraincendios e Salvamento e Consorcio Contraincendios do Deza e Tabeirós-Terra de Montes, correspondente ó mes de agosto de 2025, asinado pola Viceinterventora con data 11 de setembro de 2025, onde deixa constancia do seguinte:

“A Lei Orgánica 2/2012, de 27 de abril, introduce o concepto de período medio de pago como expresión do tempo de pago ou retraso no pago da débeda comercial, de xeito que todas as Administracións Públicas, nun novo exercicio de transparencia, deberán facer



público o seu período medio de pago que deberán calcular de acordo cunha metodoloxía común establecido no Real Decreto 635/2014 de 25 de xullo polo que se desenvolve a metodoloxía de cálculo do período medio de pago a provedores das Administracións Públicas

O período medio de pago mide o retraso no pago da débeda comercial en termos económicos, como indicador distinto respecto do período legal de pago establecido na Lei 9/2017, de 8 de novembro, de Contratos do Sector Público e na Lei 3/2004, de 29 de decembro, pola que se establecen medidas de loita contra a morosidade nas operacións comerciais.

O artigo 6 do Real Decreto 635/2014 de 25 de xullo, en relación á publicidade do período medio de pago a provedores establece que as comunidades autónomas e as corporacións locais remitirán ó Ministerio de Facenda e Administracións Públicas e publicarán periodicamente, de acordo co que se prevea na Orde HAP/2105/2012, de 1 de outubro, pola que se desenvolven as obrigas de subministro de información previstas na Lei Orgánica 2/2012, de 27 de abril, a información relativa ó seu período medio de pago a provedores referido, segundo corresponda, ao mes ou ao trimestre anterior:

Á vista deste precepto legal o servizo de Intervención elaborou o informe do período medio de pago a provedores da Deputación de Pontevedra e as entidades locais Escola Universitaria de Enfermería, Consorcio Provincial Contraincendios e Salvamento e Consorcio do Deza Tabeirós correspondente ao mes de agosto de 2025 que se expón a continuación:

PERÍODO MEDIO DE PAGO A PROVEDORES AGOSTO 2025

Entidade	Mes	Ratio Operacións Pagadas	Importe Pagos Realizados	Ratio Operacións Pendentes	Importe Pagos Pendentes	Período Medio de Pago
Deputación de Pontevedra	Agosto	18,4500000000	4.294.147,25	14,8400000000	3.479.972,64	16,8340355683
Escola de Enfermería	Agosto	2,0000000000	2.077,97	0,0000000000	0,00	2,0000000000
Consorcio de Incendios e Salvamento	Agosto	3,1600000000	16.606,00	0,0000000000	1.691,69	2,8678461598
Consorcio Deza Tabeiros	Agosto	8,7100000000	7.665,37	0,0000000000	0,00	8,7100000000
TOTAL			4.320.496,59		3.481.664,33	16,7893495605

En base aos cálculos detallados neste informe ponse de manifesto que se cumpre co



período medio de pago legalmente previsto.

A Comisión informativa de Transparencia, Réxime Interno e Facenda queda enterada do contido do **informe do período medio de pago a provedores correspondente ó mes de agosto de 2025 da Deputación Provincial de Pontevedra, da Escola Universitaria de Enfermería, do Consorcio Provincial Contraincendios e Salvamento e Consorcio Contraincendios Deza e Tabeiros-Terra de Montes**, en relación ó disposto na Lei Orgánica 2/2012, de 27 de abril de Estabilidade Orzamentaria e Sostibilidade financeira e no Real Decreto 635/2014 de 25 de xullo polo que se desenvolve a metodoloxía de cálculo do período medio de pago a provedores das Administracións Públicas.

10. Dar conta do acordo adoptado pola Xunta de Goberno na sesión ordinaria do día 5 de setembro de 2025 polo que se desestima a solicitude da empresa Orange Espagne, S.A.U. para a ampliación do prazo de presentación de ofertas no procedemento aberto convocado para a contratación do servizo corporativo de telecomunicacións da Deputación. (Exptes.- 2025062461-2025052177 - 2025007270).

O Pleno desta Deputación na sesión que tivo lugar o día 31 de xullo de 2025 aprobou o expediente de contratación para a adxudicación, mediante procedemento aberto, do servizo corporativo de telecomunicacións da Deputación de Pontevedra, figurando no acordo que o Pleno delegaba na Xunta de Goberno os actos de trámite relacionados coa adxudicación e execución do contrato.

Unha vez iniciado o prazo de presentación de ofertas a empresa Orange Espagne, S.A.U., con N.I.F. A-82009812, mediante escrito que tivo entrada no rexistro da Deputación o día 27/08/2025 (Nº rexistro WEB2025061014) solicitou a ampliación do prazo de presentación de ofertas, motivo polo que a Xunta de Goberno na sesión ordinaria do 5 de setembro de 2025 tivo que adoptar o correspondente acordo para resolver a solicitude efectuada pola empresa Orange Espagne, S.A.U., sendo o contido literal do acordo adoptado o seguinte:

“O Pleno da Deputación de Pontevedra en sesión celebrada o día 31/07/2025 aprobou o expediente de contratación mediante procedemento aberto do servizo corporativo de telecomunicacións da Deputación de Pontevedra.

O anuncio de licitación enviouse ao DOUE para a súa publicación con data 05/08/2025 e publicouse na Plataforma de contratación do sector público con data 06/08/2025 sendo o prazo de presentación de ofertas de 30 días naturais contados desde a data de envío do anuncio ao DOUE , finalizando dito prazo o 05/09/2025 as 10:00 h.



Don Iñigo Polo González, con DNI 52.475.582-R, en nome e representación da empresa ORANGE ESPAGNE, S.A.U. (en adelante, “ORANGE”), con N.I.F. A-82009812, mediante escrito que tivo entrada no rexistro da Deputación de Pontevedra o día 27/08/2025 (Nº rexistro WEB2025061014) solicita a ampliación do citado prazo de presentación de ofertas. Xustifica dita petición de acordo co seguinte:

“En primeiro lugar, o período habilitado para a presentación de ofertas coincide substancialmente co mes de agosto, tradicionalmente caracterizado por unha significativa redución da actividade empresarial. Esta situación afecta á operatividade da nosa organización, así como á dos nosos provedores, dificultando a negociación e formalización de acordos esenciais para a execución do contrato licitado.

En segundo lugar, o pasado día 22 de agosto, isto é 16 días despois de que publicasen o anuncio e os pregos, a miña representada recibiu aclaracións relativas ao documento anexo ao PPT, cuxo obxecto é “ampliar, actualizar ou aclarar a información contida no documento ANEXO ao PPT en resposta ás preguntas ou dúbidas expostas polas empresas oferentes durante o período de presentación de ofertas que fan referencia ao devandito documento ANEXO”. A información contida no referido documento introduce modificacións substanciais respecto ao anexo inicialmente publicado, o que obriga a reformular a elaboración da oferta para integrar adecuadamente os novos datos facilitados polo órgano de contratación. Esta revisión, pola súa complexidade e relevancia, require un tempo adicional que o prazo restante ata a data límite de presentación de ofertas non permite abordar coas garantías necesarias para os licitadores.

En terceiro lugar, esta parte formulou diversas consultas ao órgano de contratación, cuxa resposta resulta imprescindible para a correcta elaboración da oferta. Á data deste escrito, ditas preguntas aínda non foron respondidas.”

Con data 28/08/2025 o Xefe do Servizo de Contratación emite informe en relación con dita solicitude indicando o seguinte:

“Primeiro.— O órgano de contratación é o Pleno da Deputación de Pontevedra. En sesión do 31 de xullo de 2025, entre outros acordos, acordou delegar na Xunta de Goberno, os actos de trámites que conleven a adxudicación e execución do contrato.

Dentro deste ámbito, e tendo en consideración que o 5 de setembro finaliza o prazo de presentación de ofertas e non está prevista unha convocatoria anterior do Pleno, entendemos que a Xunta de Goberno pode resolver por delegación a solicitude da empresa Orange Espagne, S.A.U.

Segundo.-Os órganos de contratación fixarán os prazos de presentación das ofertas e solicitudes de participación tendo en conta o tempo que razoablemente poida ser necesario para preparar aquelas, atendida a complexidade do contrato, e respectando, en todo caso, os prazos mínimos fixados nesta Lei, tal e como estableceu este caso o órgano de contratación.



O artigo 138.3 LCSP fixa que a información adicional debe poñerse a disposición dos licitadores como moi tarde 6 días antes de finalizar o prazo, sen que dese precepto se desprenda unha ampliación automática cando se cumpre o devandito límite temporal.

Así mesmo, o artigo 136.2 sinala que non se ampliará o prazo inicial de presentación de ofertas cando a información adicional solicitada teña un carácter irrelevante para os efectos de poder formular unha oferta ou solicitude que sexan válidas.

A mera coincidencia do período de licitación co mes de agosto é unha circunstancia organizativa dos operadores económicos que non constitúe por si mesma un motivo legal de ampliación. A LCSP non contempla o “período vacacional” como causa de extensión, e o prazo fixado se adecua ao marco legal aplicable; polo tanto, non procede a súa ampliación por este motivo.

A empresa non identifica no seu escrito que concretas cláusulas ou extremos do anexo ao PPT son substanciais, en que termos e como iso impacta na preparación da oferta. Sen esa especificación mínima, o órgano de contratación non pode apreciar a concorrencia do suposto do art. 138 LCSP relativo a “modificacións significativas dos pregos”, que —insistimos— circunscríbese a alteracións de clasificación, importe/prazo, obrigacións do adxudicatario ou do propio obxecto do contrato. A carga de concretar e xustificar tales extremos corresponde a quen solicita a ampliación.

A xuízo dos técnicos de Novas Tecnoloxías non se facilitou ningunha información con ese carácter substancial.

CONCLUSIÓN

Á vista do anterior, non se aprecia na solicitude ningún elemento claro e específico que xustifique a ampliación do prazo de presentación de ofertas nos termos do art. 138 LCSP; en particular, non se concreta a existencia de “modificacións substanciais” no sentido estrito definido pola Lei, nin debe ser considerado que a licitación coincida no mes de agosto.

Polo tanto, enténdese que a solicitude debe ser desestimada.”

Por todo o exposto, ao abeiro da disposición adicional segunda da Lei 9/2017, de 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, que no seu apartado 2, establece que corresponde ó Pleno actuar coma órgano de contratación neste contrato, e tendo en conta o disposto no artigo 185 do Real Decreto Lexislativo 2/2004, de 5 de marzo, polo que se aproba o Texto refundido da Lei Reguladora das Facendas Locais e o establecido nas bases de execución do orzamento provincial, concretamente na Base 16ª.3 onde figura que lle compete ó Pleno a disposición e autorización dos gastos precisos para o presente expediente de contratación, e tendo en conta o acordo do pleno de data 31/07/2025 polo que acordou delegar na Xunta de Goberno, os actos de trámites que conleven a adxudicación e execución do contrato, a Xunta de Goberno acorda por unanimidade:



Desestimar a solicitude da empresa Orange Espagne SAU de ampliación do prazo de presentación de ofertas do procedemento aberto convocado para a contratación do servizo corporativo de telecomunicacións da Deputación de Pontevedra.”

A Comisión informativa de Transparencia, Réxime Interno e Facenda queda enterada do contido do acordo adoptado pola Xunta de Goberno na sesión ordinaria do día 5 de setembro de 2025 en relación a solicitude efectuada pola empresa ORANGE ESPAGNE, S.A.U. (C.I.F. A-82009812), para a ampliación do prazo de presentación de ofertas no procedemento aberto convocado para a contratación do servizo corporativo de telecomunicacións da Deputación.

11. Rogos e preguntas.

Non se produciron.

E non habendo máis asuntos que tratar, pola Presidencia dáse por finalizado o acto, sendo as doce horas e cinco minutos do día arriba sinalado, do que, como Secretario, dou fe.

O Secretario da Comisión
Asdo.: José Antonio Gulías Varela
(Documento asinado electrónicamente ó marxe)

